



JSMP lamenta membru Governu ho polítiku sira halo intervensaun direta ba iha serbisu investigasaun judisiál

JSMP lamenta ho membru Governu no polítiku sira halo intervensaun direta ba iha serbisu investigasaun judisiál nian. Preokupasaun ida ne'e relasiona ho membru Governu na'in rua husi partidu KHUNTO (Partidu Kmanek Haburas Unidade Nasionál Timor-Oan) mak hanesan Viseministru Ministériu Interiór no Viseministru Ministériu Justisa no líder másimu husi partidu KHUNTO ne'ebé diretamente tun ba halo intervensaun ba serbisu investigasaun judisiál nian. Intervensaun ne'e mosu, tanba serbisu investigasaun konsege kaptura sidadaun na'in tolu inklui prende osan *cash* US\$130.000 no osan *rupiah* iha Aeroportu Internasionál Nicolau Lobato ne'ebé deskonfia osan ne'e Partidu KHUNTO nian atu lori sai ba rai-li'ur, tuir públikasaun iha mídia sosiál, iha Tersa-Feira 04 Outubru 2022.

Kualkér intervensaun tantu direta no indireta husi Órgaun Ezekutivu ba iha Órgaun Judisiáriu nia serbisu hakanek ona prinsípiu separasaun podér ne'ebé previstu iha Konstituisaun RDTL no fó impaktu ba sira ne'ebé mak serbisu hodi hametin sistema justisa iha Timor-Leste, sistema ida ne'ebé iha hela prosesu dezemvolvimentu nia laran.

Artigu 69 Konstituisaun RDTL kona-ba prinsípiu haketak podér sira, define katak “Órgaun soberania sira, iha sira-nia relasaun ba-malu no bainhira hala'o knaar, tenke tuir prinsípiu separasaun no interdependénsia kbiit nian ne'ebé iha Lei-Inan nia laran”.

Artigu ne'e hatudu klaru katak órgaun soberanu sira iha relasaun ba-malu no bainhira hala'o knaar, tenke tuir prinsípiu separasaun no interdependénsia kbiit nian ne'ebé prevee iha Konstituisaun.

Ho nune'e, JSMP nia hanoin instituisaun judisiál no judisiáriu tenke livre husi intervensaun ka influénsia husi se de'it no saida de'it, no mós livre husi presaan. Nune'e mós ba juis, sira tenke livre husi relasaun ne'ebé iha poténsia fó ameasa ba sira nia independénsia no instituisaun tribunál rasik.

Iha kazu konkretu, JSMP konsidera intervensaun husi polítiku sira ne'e hanesan

impedimentu ka ilude ba autoridade kompetente (investigasaun) nia atividade provatóriu ka preventiva ho intensaun atu evita sidadaun sira ne'ebé lori sai osan sein deklara ba Alfândega hodi la hetan medida seguransa ka pena hanesan prevee iha provizaun parágrafu 1) Artigu 290 kona-ba krime favoresimentu pesoál ne'ebé presiza submete ba iha investigasaun. Intervensaun ka krime ne'e agrava tan, tanba prátika husi ema ne'ebé iha kompeténsia hanesan prevee iha parágrafu 2) artigu ne'e. Iha kazu ida ne'e, intervensaun hala'o diretamente husi superiór sira ne'ebé instituisaun judisiál sira ne'e tutela ba hanesan Ministériu Justisa no Ministériu Interiór.

Alende ne'e, aktu intervensaun ne'e mós konstitui ona elementu krime abuza poder hanesan prevee iha provizaun Artigu 297 Kódigu Penál tanba aktu ne'e komete husi Viseministru Ministériu Justisa no Viseministru Ministériu Interiór ne'ebé asume kargu iha funsaun públika hanesan prevee iha provizaun Artigu 302 Kódigu Penál.

Enkuantu, relasiona ho osan ne'ebé hetan prende, tuir JSMP, parte investigasaun hala'o duni sira nia serbisu ho profesionál tuir Artigu 7 husi *Lei Nú. 5/2013, Primeira Alteração à Lei Nú. 17/2011, de 28 de dezembro, que aprova o Regime Jurídico da Prevenção e do Combate ao Branqueamento de Capitais e ao Financiamento do Terrorismo, e Terceira Alteração ao Código Penal, aprovado pelo Decreto-Lei Nú. 19/2009, de 8 de abril*, ne'ebé define kona-ba obrigasaun atu deklara bainhira transporta moeda (osan) ka *portador negociável*. Artigu ne'e hateten katak pesoa singulár ida bainhira lori osan ho montante US\$10.000 ba leten tenke halo deklarasaun iha órgaun kompetente refere ba Alfândega no kópia ba iha Unidade Investigasaun Finanseiru, Banku Sentrá.

Regra ida ne'e, nu'udar regra internasionál ne'ebé nasaun sira uza hodi tau-matan ba osan tama no sai liuliu ba osan sira ne'ebé ho meu transferénsia *cash* ka sira ne'ebé ho valor bo'ot ne'ebé iha risku besik ba atividade kriminál sira (krime trans-nasionál) hanesan uza hodi sustenta atividade organizasaun kriminál nian. Iha nasaun barak, autór kriminál sira prefere uza osan *cash* duke transfere liuhusi banku.

Tanba ne'e, bainhira sidadaun ida lori tama ka sai osan ho montante US\$10.000 ba leten maibé la deklara ba iha Alfândega kona-ba fonte orsamentu no utilizaun orsamentu refere, maka parte kompetente iha obrigasaun atu prende osan ne'e no kaptura sidadaun refere hodi submete ba iha prosesu investigasaun. Lei la bandu sidadaun atu lori osan ho montante bo'ot maibé presiza deklara ba iha parte Alfândega no banku nu'udar medida prevensaun ida ba aktu kriminál sira. Bainhira rezultadu investigasaun mak orsamentu refere la'ós mai husi atividade ilegál ka krime, maka osan refere sei entrega filafali ba iha osan na'in.

Iha kazu konkretu, JSMP louva serbisu investigasaun ne'ebé kontinua serbisu ho profesionál no tuir lei maski hetan intervensaun maka'as husi nível altu sira iha Governu.

Haree ba fundamentu no baze legál sira refere, JSMP rekomenda ba parte hotu, órgaun Estadu sira, polítiku sira atu la bele halo intervensaun ba serbisu sira setór justisa nian hodi nune'e instituisaun judisiál no judisiáriu sira bele serbisu ho livre no independente. JSMP mós rekomenda mós parte judisiál no judisiáriu hodi halo investigasaun ba membru Governu no polítiku sira ne'ebé halo intervensaun ba prosesu judisiál.

Dili, 11 Outubru 2022